



Айкелат ханшилдысув, ханты ясцев шавилдысув



шавацал. Щита тухал хоятан хонна ант хулдыйм ясаңат улдат, муй щиран муң оврацлуд па щацилуд потартысат.

Газетая потрат поныдытэв тумпийн, муң хонна «ВКонтакте» па «Одноклассники» хоца улдув. Щий потрат поныдытэван муң ищи арталалуд, муй хорпи потрат хоятата мослат, муй отат педа па кашлы-пушлэт. Тал сьс щи соцсетятна хоятэв ищи ара йис. Тал питщаман «ВКонтакте» щёрас ветсот хоят ус, тал сохантыйн хащ кат щёраса ёхатсув. «Одноклассники» хоца нялсот хус хоят элты лапатсот молтаса йиты питас.

Кашң хоятэма вутщидам пу-маципа ясаң ястаты! Тамиты ияха юрэв па щёмев понман муң, кашң хоят, ун вер верлуд. Ясцев шавилдэв, улапса щирэв елды тулэв. Там ядпа питты талдан тумтака улаты, ал му-щитаты. Кашң хоттэдан туп амат, няврэмат па хилэт нях ат щащал. Ойңа-пищана, йисаңа-нуптаңа!

Хор: Альбина Тырлина

Ханам ёх па ханам нэңат, Ядпа питты тал пидан! Там талэв сохнас. Верытмев кеман округ доватан тыйидыйм верат элты айкелат ханшилдысув. Ай куртатан па ун вошатан улам волаң верат элты ищи потрэв тувилдысув.

Тампуш ар потар няврэм, хоттэд хоятат элты ханшилдысув. Тадаң тэдан ант верытсэв кашң хоттэд потра понты. Муң уятлэв, па нын ищи уйтлаты – щимащ хоятат муң кутэван улдат. Ханты мир улапса, ясаң тулат. Лув онтасэдан па мир хоятат аршак уятты питсат, муй ям верат ханты хоятат тайлат. Муй хорпи каркамелан па тусэдан постама вердал паты унты тулдал.

Касдыман яңхты па хул ведпаслаты хоятлуд онтасан муң ханты мир улапсаев хонна дылаң. Щишан там мосмаңа тай-ты хоятлуд ищи ант ёрэмислуд. Лув улапсаед тумпийн хонна

ханшилдысув, муй хорпи нё-топсайт округ доватан верман улдат. Кашң хоят ат уйтас, муй хорпи нётопса утхот элты вохты мосал, муй ураңан там па тум пормас мийдыла. Щи тумпийн, касдыман яңхты хоятлуд няврэмат ашкуда юпийн ун тахаята уталтыты мантэдан, ищи нё-топсайн мадайт. Щит элты муң «Дух Авт» газетайн ищи тал сьс ханшилдысув.

Энамты няврэмат па лув аңкидал-ащидал ураңан потар верыдысув, холта рахал ашкуда юпийн уталтыты манты. Ванты, щимащ тахаятан няврэмат уталтадайт, лудан, елды хатлатан лув верытсат ханты мирэл кутан рупитты па ун онтас туты. Уталтытэд тумпийн рахал грант ох щитты, щи веран мосал турамсот касапсаята пилтащиты, юрэл па щёмел арталыты. Тухал няврэмат элты потрат ищи верыдысув. Муңева ищи умащ уйтты, муй хорпи верат энамты няврэмат кутан

тыйидылат, хоты сахат лув улдилдылат.

Хулмет тала йис, хоты кашң хоятэв рутал, яйл, апщел, ащел, аспохал, лэхуйл ляль харан ул. Шеңк щаль, тухаллуд щи ляльн антома йисат. Араталан потар верыдысув щита улты па улам хоятат элты, муй хорпи нётопсайт лялясты мохилуд па лув хоттэд хоятлуд ураңан улдат. Папуш Ямал муван герой Тада постаса, хон мув доватан Хон мувев сайлаты хоятлува юкантса. Щи веран 2025-мет талдан ар потар там питама ляль харан улты па Ун Ляльн улам хоятлуд элты ханшты питлуд. Ляль порайн рупитам хоятлуд па нумадмиллуд. Хой айкел тайл, ханшаты.

Хольмаң педа хулам тала йис, хоты кашң лапат монщат, йис потрат, луңтарат ай няврэмат па ун хоятат кеша понлуд. Щи рупатаев ищиты елды туты питлэв, Ванты, тамащ потрат онтасан ханты ясаң мет ямас

Алина Яковлева
ханшам потар



Йидап коралят ропытта питсат

Приуральской районна йидап коралят верта етсаптасайт. Йи кораль «Паюта» корты ёс станция хоцаңна ол, кимет па 76 км, Лонгот фактория хоцаңна.

Тамхатл эвалт кацаң нэң-хэтна мули тайта веритдайт. Касаң кораль холам йит эвалт верман ол: ит ропытты, ит предварительной, ит общий па холам накопительной.

Ямал мув губернатор Дмитрий Артюхов Овс мув хуват яңхмална кацаң нэңхэт мет такан коралят пушци лавсат, каррайт, ид аракта питсат. Ши порайтна партапсы нэпек этас, лотта па аматта 14 кораль округ хуват.



Тус монщаң па араң хоятат нэмаат ястасайт

Хацам дапатаң Овс мув шимлаң мир хоятат верат туты пиран улты департамент «Мастер фольклорного жанра» касасая пилтащийм хоятат нэмаат ястас. Ханты мир кутан няд хоят нэпек китыдыйс. Лув кутэдан Тамара Александровна Пырысева нох питас.

Тамара Александровна ханты мирэван шеңк яма уйтла. 2005-мет талдан лув ёра потардал па луңтардал ханты ясаңан ханшты питсалды. Ай вош нэ ясаң элты, лув мет олаңан няврэмат ураңан ай луңтарыет ханшилдыс. Юхат и вантман уна йиты питсат, щалта ара понты питсалды.

Усть-Войкары куртан ван хатлап тылащ 3-мет хатадан 1949-мет талдан сэма питас. 1966-мет талдан Ващъёханов нийл талпи ашкуда, 1970-мет талдан Пулцават педу-чилица етшаптасды. Уталтыты етшамал юпийн Ямкурта рупитты китса, ши юпийн Овкурт ашкудайн рупитты питас. Ванты, ай куртаң ашкуда лап пентса. 1981-мет талдан номас понас Лорвоша касалты па щита елды рупитты. Ши ашкудайн 29 тал рупитас. Араталдан няврэмат уталтыты щирада 43 тал мас.

Мата куртан ант ат рупитас, кашң тахайн няврэмат па ун хоятат яха актыдысды, араң па монщаң харата вохилдысды. Ияха куртат па вошат хуват яңхилдысат,



Хор: Зоя Курганова

ханты арат па монщат мира эталтысат. Тамара Александровна юр па номас араң нэпека понас. Лув ёра ханшам ардал ин там хатлатан кашң куртаң па вошаң емаң хатлатан щалдаат. Мужи вошан улты «Ай Ас ёх» фольклорной коллектив ураңан инты унты арат ханшад.

2012-мет па 2024-мет талатан «Душа народов Ямала» нэман юконтса. Ванты лув ардал аратал мира шеңк мосмаңа йисат. Ардал суктатыйн, имохты талаң потар па улапса щир этал. Матты ки

лув Ай вош куртадан улдыдысан, щита улам хоятат пилан уйтантысан.

Ханты мир потрат, арат, монщат ищиты елды Тамара Александровна элты ат хулдылдув. Лув уталтам па уталтыты няврэмал кашң пуш касасаята пилтащилат па мойдапсайт моцатылдат. Ма нумастэман, тамащ хоятэв онтасан муң ханты мир ясеңев, ар совет ант хурдал па елды Ас йиңк иты овал, Кев вот иты подал.

Алина Тоярова ханшам потар

Аршак тахайн сютсядат

Ялпа йиты хулам тал сыс округ няврэмлдув хулам пуш аршак Ямал музеван сютсяты тахаятан лэсятдайт. Няврэмат округеван сютсяты порайн, кат пуша аршак лув пилэдан рупитты хоятат уталтаты мосты питал.

Ядап тал тыдась олаңмет хатл элты, хой няврэмат педа самал хошийл, хой лув пилэдан рупитты лытла, нэпекат китты верытлат. Си кеша молтас рупитты харат лэсятдайт.



Хор: Андрей Ткачев

«Ялпа йиты хулам тал сыс, луңан няврэмат сютсяты тахаятан, муңева кат пуш аршак рупитты хоятат мосмитлат. Нялсот педа ветьяң элты дапатсот хоят унты. Аршак сютсяты смена питал. Энамты ёх политика направленийт пилан яха пилтащман, регионэван няврэмат пилан рупатаев туңа-сира па елды туты ураңан, лэсятлдув», – ЯНАО энамты ёх департамент куся ху Наиль Хайруллин ясаң верас.

Мет водаң верат кутан – округ водаң вошпатаң вожатой ашкудайт пуншлайт. Кашң дапат рупатаел манты питал. Тематической сменята яңхты няврэмат пилан рупатаел тутат.

Там талдан нядьяң педа вет сёрс няврэм па энамты ёх касасая харатан кассат, «Развитие молодежной политики» программа хуват пилтасман, 2024-мет талдан хольмаң педа хулам проект лэсятман ус.

Альбина Тырлина ханшам потар

ОБЪЯВЛЕНИЕ

СЛУЖБА
ПО КОНТРАКТУ
В ВС РФ

ПОЛНАЯ ИНФОРМАЦИЯ ПО ТЕЛЕФОНУ

8(902)81-6-11-90

ЗВОНОК ПО РОССИИ БЕСПЛАТНО

ВРЕМЯ ДЛЯ
ВАЖНЫХ РЕШЕНИЙ!

КОНТРАКТНАЯ СЛУЖБА

5 000 000 Р

ЕДИНОВРЕМЕННАЯ ВЫПЛАТА

2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления прописки в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р

400 000 Р

ЕДИНОВРЕМЕННО ОТ РЕГИОНА

МИНИСТЕРСТВО ОБОРОНЫ

ДО 120 000 Р

ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ
ОТ 210 Т.Р.

СЕРЖАНТ
ОТ 232 Т.Р.

ПРАПОРЩИК
ОТ 292 Т.Р.

Ашкуда куца нэ верам айкел



Г.А. Новикова

Хор: Владимир Енов

Галина Алексеевна ар няврэмәң хоттэлән сәма питас. Холд уна йисат, энапсат, арсыр тахаятн уталтысат. Хон Петра вошан Пулцаватан, Асов куртан удлат. Хоты там рупатая питас, щит элты ясцев елды тулды:

– Ма там куртаң ашкудаемаң 32-мет тал рупитлам. Ёхатме-ман, ашкуда куца нәңа Ольга Геннадьевна Жернакова шуңат ус. Лув манэм няврэмат хатлат сис лавалты нәңа тый рупиттыя вохсалды. Юхат ма ай классатан няврэмат уталтаты питсам. Елды уталтысам па похат-эвет руц ясна па литературая уталтаты нәңа йисам. Щиңанца 2011-мет тал вуш элты уталтаты нәңдаман Асов ашкуда куца нәңа пирысайм. 2013-мет талн ай няврэмат яңхты садик кутоп ашкудаева маса. Ин Образовательно-воспитательной центра йис.

– Муй арат хатнәху тамхатл нын хошайн няврэмат уталтал?

– Ин муң хоцаев няврэмат уталтыман араталн 23 хатнәху уд. Ар тал сис похат-эвет уталтаты хоятат ищи удлат. Хув вуш элты Вера Филипповна Ильина рупитл. Лув рупата талдал 40-мет талд ванамасат. Щалта Екатерина Михайловна Ганюгина па рупитл. Педагогической рупата верал талдәтлән 46-мет тал хувата щит йил. Щит шеңк вещьката муң няврэмлүв пилан рупитты хатнәху. Алла Александровна Ильина ар тал сис ашкудаевн биология верата ай ёхлүв уталтас па 16 тал сис ашкуда куца лаңкар нәңа ус. Там пуш лув щутцатгы манас. Социальной педагога муң хоцаев Светлана Владиславовна Халиулина уд. Щалта Михаил Валерьевич Новиков няврэмат

Кашң хатнәху ашкудая уталтатыя яңхас. Ма ищиты катра Асов куртаң ашкудайн уталтысам. Щиңанца щит вер вушат элты нялъяң молтас тал ёхи щит хащас. Мосванан ма рут муван усам па щит ашкудаема доңтысам, лув куца нәңал Галина Алексеевна Новикова (Енова) пилн ияха уйтантысман па няврэмат уталтаты верат элты потартсаман. Газетая потрәв ләщатмев порайн, ям айкелан ёхатсаюв – «Почётный работник сферы образования Российской Федерации» нэман юкантса.

юх элты арсыр пормасат вертыя уталтал. Светлана Александровна Маклакова физкультура верат муң ай ёхлува япсыена кашң хатл сис вандал. Щиңанца няврэмат уталтаты ёх па удлат, мата хоятат Асова ёхи хащам талатн рупиттыя ёхатсат.

– Галина Алексеевна, муй арат

няврэм там пуш нын ашкудайн етшаптас?

– Там пуш 10-мет па 11-мет классатн уталтаты ай ёх ант па тайсув. Яртъяңмет класс етшаптам вет няврэм муң ашкудаев юпийн елды уталтатыя Пулцават вош многопрофильной колледжа мантсат.

Там талн Асов куртаң кутоп ашкудаевн 52 ай ёх уталталув. Щалта 26 ай няврэм садик хотэва ёхтас. Колледж етшаптаты арпелак пох па эви Пулцават вошевн хащлат па щита улты-холты щирдал ләщатлат. Муң хоцаев тата ищипа рупата антом.

Там йисн Асован туп куртаң куца хотэв, кутоп ашкудаев, нови тут вушитты па хотат хошмалты тахайдан рупитлаңан. Щикуш худ велпаслаты тахаев уд па лый хоцаед там кутн рупитты хоятал ар.

– Муйсыр нопсат няврэмат уталтаты щирн па тайлаты?

– Ма щирэман, муң шеңк мо-сты па умащ рупата верат кашң тал пораятн ләщатлүв. Муй арат хатнәху ашкудаев юпийн волаң хоятта йис. Щит вер ураңан тата хонна «Ими гордится школа» нәмпи сохал ләщатсув па щимащ ёхлүв нэмаг нох ханшсув. Елды муң ищиты верытты кеман рупиттыя питлүв.

– Галина Алексеевна, нын мо-сты вер верлаты, ищиты елды тумтака па яма удаты! Шеңк ар юр па номас муңева катра па там йисн няврэм уталтаты хоятат малат.

Нумадмалув щимащ Асов куртаң 8-талпи ашкудайн муңев япсыена па вещьката уталтам нәңдүв: Е.Г. Елескина, З.Д. Новикова, Л.А. Ковалёва, Р.Т. Завьялова. Шеңк такан тайсаюв па туса руц ясна уталтасаюв. Мосаң, щит ураңан муң тамхатл елды улты-холты щирлүв там нови турум илпийн туса верлүв!

Владимир Енов
ханшам потар



Хор: Наталья Тарасова



* * *

Ханты хоятлув ялап тал пидан! Тумтака, ойңа, пицаңа. Худ велты ёх ар худ ат веллат, вулэң ёх ташел уна ат йил. Энамты няврэмат яма уталгыты, волаң хоятата юваты. Ван хоятдан пидан кутланан яма улаты.

Екатерина Петровна Конева,
с.Лопхари

* * *

Касаң йилап йиты тал хатлат монщ хорпет. Альпаң, найң йилап хатлат касаң нэңху ох элты ат оллаат. Камн тал кепа, самна хасам ат ол.

Ма нынан там йиты йилап тална, ям, хасам ясаңат китлам. Халэват хатл найң па хасам ат ол касаң нэңху ораңна. Йилап тал пидна!

Галина Яковлевна Худи,
п.Зелёный Яр

Ялап 2025-мет

* * *

Ямал-атмал хотащ ши там тал усэв. Овс мув шимлаң мир хоятыйлув, Ялап тал пидан! Елды так номас понаты па тумтака улаты. Няврэмдан па хилыдан туңа-щира энмалтадан. Вердан иса туңа ат манлат. Калтаңан ат шавилайты.

Мария Александровна Ковалёва,
с.Овгорт

* * *

Ялап 2025-мет тал елды яма ат манал! Нулама лялесты от нох ат воыйл. Куцайт кутладан ешацты патыйн, муй арат ёх хоят нэмолты верды лыдлал сохантсат. Самлув хошилат, похлув ёхи лавадман. Тохи юран тутдыйм, щиты маныйдым няврэмлув лыдңа ёхи ат ёхатлат!

Екатерина Ивановна
Лонгортова, с.Овгорт



Хор: Зоя Курганова

* * *

Там ялап ёхатты емаң вой талдан ханты хоятлува ястаты утцидам, елды тумтака ат уллат. Ханты щир улапсаев ант ат ёрэмалэл, потартлат, ханшлат. Няврэмдал ханты ясаңа ат уталгалдал, кум шитман ёдан ищи рут ясаңан ат потарлат. Ёдан рут ясаңан потартла ки, щиты ханты ясеңев елды улты питад, няврэмат ясаң худантты

питлат, яма уталгыдат. Энамты ёх мир ловатан лувилал яма ат эталталдал, ханты ёх мир хуват ат уятла. Ун-шак хоятата тумтака улты, муш ант вантты. Рупитты хоятат вердал елды самаңа ат тулдал. Худ велты ёх яма ат велпаслатат. Вуды таш энмалты ёх войдал шавиман ат тайдалдал, ар-шак нёхи ат хорлат, улапсаел елды манал.

Иван Эдуардович Сандрин, с.Мужи



* * *

Ядап ёхатты талдан ханты хоятат мойлаты ясаңан китладдам. Восты хув ващ вой тада йил. Муй хорпи ядап талэв питал?

Кашң хоттэд хоятат па рутлад тумтака, ойңа ат улдат, каркама рупитлат. Няврэмлад ошаңа энамлат, елды яма ат улдат. Ям пора ат ёхатад, ляль сора ат етшал. Хоятлуд, няврэмлуд тумтака ёхи ат ёхатлат, Тураман ат шавилайт.

Ханты хоятлуд туңа, аматман, ойңа ат улдат! Ядап ёхатты талдан кашң рут хоятат яха ат ёхатлат, уйтантыдат, яма ат улдат!

Апполиария Максимовна Садомина, с.Яр-Сале

* * *

Шоши мув улты хоятлама мойлапса ясаң китдам. Ядпа ёхатты талдан кашң хоят улапсайл, лувел мосты циран ат манал. Хоттэд мохет няврэмлад энмалман тумтак улдат. Няврэм нях иса ат щачал. Ун хоятлад шавиман ат тайдалдал. Ойңа-нопсаңа, елды пела!

Наталья Сергеевна Талигина,
г.Салехард



Хор: Наталья Талигина

Талд шилдан!



* * *

Йилап талд ши ёхатл, касаң хатна йилап, нави хатдат ат тул.

Амат касаң хатна, касаң нәңху ораңна. Ляль сара ат етсал, нави Тормаң хатдат касаң хатл ат питлат. Хонты нәңхэт кутладна самаңат олта питлат, топ ши порайна мур ямас олта питл.

Йилап талд пилна!

Марина Алексеевна Атаман,
п.Зелёный Яр

* * *

Касаң хат ув сыдна йилап талд лайл! Мала лув муңев тул? Маса лув амтаң, самаң олта питл олам талд эвалт.

Касаң нәңху ораңна хатлат хасмат па наяңат ат оллат. Йилап талд нәңхэт ораңна мосды ат манал!

Аса ям ат ол, ши порайна самна хасам олта питл.

Нина Яковлевна Климова,
п.Зелёный Яр

* * *

Ям мирэва, ям хоятлува, ханамлува, няврэмлува, хилыдува Лорвош ёх эдты ям номас, тумтак ясаң китлуд. Ялап талдна тумтака уллаты, няврэмлын энмалтаты. Ляльна яңхты няврэмлуд ёхды ат ёхатлат. Лялев ат етшас. Тумтак уллаты. Турам Ақкина ат шавилайты.

Маргарита Константиновна Шиянова,
с.Шурышкары



Хор: Альбина Тарпина

* * *

Йилэп олэн ма хоятата лаңхалум ястата тэм ясаң. Йема ат воллуд, мошет, арум верат ат хува мәнлэт. Оеңа волдыты, дат йем Торум нын мувена вод ешек най ими ат хотлын лавлэд луңлан ат нынат лавэллэт! Неврэмат ат йема энэмлат, вэн хоятат хув нопэт воллат!

Округевн волупса ема йил! Йилап хотат ат омаслат! Йилап ропитта тохет ат па вердат! Хув па оең нопэт мэң округева!

Галина Пенчакувна Кечимова, г.Муравленко



Хор: Альбина Тарпина



Щутцаты умащ пора!

Эвиет-похиет, вуца улаты! Пора сора хащал.
Ялап тал емаң хатлат ёхатсат. Няврэмат
ашкуда элты щутцалат, камн, аплак ку-
тан навратлыдат, рэп элты хатэмилдат, дохан
хухатлыдат.

Талаң хатл камн вуратыман, метты юпийн,
ёдан хошам кур пуңалан газетаева по-
нам луңтарат луңтаты па ашцидан пилан
уталтаты.



Хор: Лилия Рочева



Хор: dzen.ru

Унтан сэма питас хул

Унтан сэма питас хул,
Энмас унтан хул.
Талан па луңан нярак ус,
Восты хорасаң ус.

Вотасна арна арыса:
«Хулые, бай-бай!»
Иськина донсьна лаңкиса:
«Эдыен питад сай!»

Палтап тайты ай шоврыи
Хул илпийн наврас.
Порайн евр, ликасың евр
Лув лепадан хухлас.

Шик юхаң унтэв лыпина
Донсь ухаң
патыян шихарал:
Пунаң курпи ай ловие
Тэрмасыман нёхамтал.

Ловие талад ухдые,
Ухадан омпсал икие.
Лув ин хулэв ил сэвармал
Волдые вош пуляң.

Ин лув хорама верами
Па емаң хавтдэва омпсами.
Лув сита ар ой, ар ой лув
Няврэмлува верал.

Геннадий Кельчин

Геннадий Кельчин

Нови нётаят

Нови па нови нётаят,
Исимет тайлаты туш.
Тэдыя нын, хота ёхамат,
Вордалты нови сах пушн.
Пошам йиңк уңданна
йинсьдаты,
Мув хося ханятман дэр.
Веккеша, ясталэм, питлаты
Улэта мойдаты юр.
Нови па нови нётаят,
Ёх кеша, вой кеша нын
Юранна най пела нётсаты
Нюрмем адамты нын.

Прокопий Явтысый

Ялап тал

Вуся ясаң китдам нынан,
Ялап талан, ялап вер!
Юрдан, сёмдан яха понман,
Туңа-сира улаты!

Вевтам верат йира хайты
Тарм ясаң каншаты!
Ясаң рува ал хататы,
Туса, туңа потартаты!

Мосал улты духас щирн,
Ям номасн потрэматы!
Верат туса, туңа верты,
Ялап сирн елды улты!

Алексей Сенгепов

Мув куся

Ант палты хантэт
Унт муван уллат,
Палтап вой элты
Ант па лув палдат.

Унта лув мантэдан
Пошкан туп тайлат,
Лайм туп тайлат
Вуты мантэдан.

Вотас куш улдыйл –
Туңа лув яңхлат.
Иськи ки тарам –
Иси ант палдат.

Патлама йитыйн
Ёхи лув йилат.
Ханты ху элты
Унт войен падал.

Ёхмаң па пухраң
Унт мувев хося
Вантыман яңхты
Ханты ху куся.

Владимир Волдин

Сумат

Сумат юх дойл
Ма ишнем елпийн.
Лаңкасам донцалан
Селохан ворлыыл.
Кияртам ям нувлад
Донц раван руватмал,
Ищимет ар кураң
Сэвал ил эсалмал.
Щиты щи дойл,
Кутпаң ат кутан,
Одаман лаңкасан,
Нови ям сумтыем.
Сорни тут луман,
Тылащан поханман,
Донц сэват лямпилад.
Холаңад ар хуглен,
Там хатад па этад,
Ёхатда ар донцен
Нувлада па питад.

Геннадий Кельчин



Хор: Зоя Курьямова



СУРГУТСКИЙ
ДИАЛЕКТ

Мөкмөк панә Мәңк ими



Хор: dzen.ru

Мөкмөк аңқанкилнат вөлдхән. Мөкмөк аңқанкилнам әһнам әнтә кәләнтәх, қатләпты рәпи қатәхдәл. Рәп қот ивәд қөвән вәл. Аңқанкил ястәл:

– Нүң қөққәнам ал йаңқида, мөкмөкәли, тәт Мәңк ими йаңқиләл. Төвә рәпа йөвәталқа, нүңат йөта тул.

Мөкмөк төвнам әнтә кәләнтәх, әтә арит тю рәпнам йаңқиләх. Әй латнә қатәхдәх, қатәхдәх, панә Мәңк ими төвә ти әт. Пөчәлнә тәнтәх қынт тәй. Пәх қатәпта йәхәма, Мәңк иминә рәп ылпи қынтат катли, панә пәх тю қынта кәрәх. Мәңк иминә қутәднам туви.

Мөкмөк йөта ай кәчхәли тәй. Лүвнә қынт вәсат вәри, кем нәврәмәх панә қөнт.

– Я тәқа, – ястәл Мәңк ими, – пырнә әс йөвәтләм.

Кимәтхә мөкмөк қатәхдәта мән. Қатәхдәх, қатәхдәх мөкмөк. Мәңк ими йөвәт. Тю йөвәтмәднә, тәм латнә лүв юх қынт тув. Пәх қатәдмәл латнә, чәм юх қынта қатәп. Мәңк иминә туви.

Пәх кәчәхнат қынт қөвә мүв ван пәрисләтәх, пәрисләтәх, әй латнә қынт вәсәңкә ти йәх. Мөкмөк кем кәрәх панә йәқәнам нүрәхтәх.

– Я тәқа, – ястәл Мәңк ими, – әс пырнә йөвәтләм.



© Anton Apostol



Хор: Василий Петров

най кича юх кәнчча йаңқләм. Пут вәрләм, тют пырнә мән нүңат нөк дилув.

Ләйләл, чопәнка, найнам пут лойхәл. Мөкмөк әпри-саңқи вәл. Әй мәта урнә лүват илә лосхәлтәх. Мәңк ими нәврәмхән вәйхәл панә лүв мавәлат пута вуртхәл, әлөхат пут ылә лиңктәх.

Әй мәта тохинә мөкмөк йаңқ вәх йөхтәх. Найнә мустан мин нөк пүмәлтәмин, тютәднат юха қунәт. Мәңк ими пәрхи йөвәтмәл латнә, ләйләл, мөкмөк әнтәм. Пут илә ти пунччәх, тәми, путнә лүв нәврәмхәл кевәртләхән.

Мәңк ими пытәтмәх:

– Ти мөкмөк панпә нөк нәәлқәмтәләм. Әйәхтәтам латнә, нык пә әнтә кевәртләм, нярхан диләм.

Кәләнтәл, мөкмөк вихтә сүй. Қоты кем ливәт, тю пәх юхнә омсәл. Мәңк ими пытмин ястәх:

– Ма нүңат ит панпә нөк диләм! Мөкмөк ястәл:

– Ма нүң ныңктә пәлдәм! Ма маннам нүң лүдәна нәврәмләм. Лүдә илә пунчә.

Мәңк ими нәләк, лүдәл илә пунччәх. Пәхнә кеврәм йаңқ вәх Мәңк ими лүд вәснам әсләмты, панә лүв архә пәләкинт. Мөкмөк лүвнам йәқәнам мән. Тют пырнә әс пә тю рәпи әнтә қатәхдәх.

Қудмәтхә мөкмөк қатәхдәта мән. Қатәхдәх, қатәхдәх, әс Мәңк ими йөвәт, вәх қынт тув. Мөкмөк қатәп, вәх қынта кәрәх, Мәңк иминә туви. Тәм латнә тувмәл, чәмә йәқә мөчә тувтәх.

Қынты кем тылтәх панә юха йүртәх. Мәңк ими кат нәврәмхән тәй, лин туюким лита йәккән, мөкмөк қөт нөк әнтә дивтән. Мәңк ими пәхнам ястәл:

– Нүң тәт ымса, ма

Сәсәх илты моньтә

Лүк төвәнә Төрәмнә тенә арьяли. Оләннә ылә әсли. Лүк Төрәм икинә төвәнә арьяли, сәсәх ылпинә кәв чүк аныта. Түләх унча кәв чүк пүкләңәда аныйәммин йаңқтахә. Сәсәх ылпия сөччәхә.

Лүк кәв чүк аныйәмин сөчитәднә, әй латнә сәсәх ылпинә нәвмәл, кәв ләңәтмин:

– Тәм чүкам осхә однә диләм, тәм кәв чүкам қәлтохил диләм.

Төвәнә ләңтәксәтал сохит, лүк сәсәх пүкләң нәвәтәх, сәсәх лүв өвтыда роқинтәх.

Сәсәх пүкләң юққән лүк ванхә йөвәттәқа, нюлнам нәвәмләхән. Әй пүкләң юхәл ястәл:

– Ма қөнтхи ти лүкләм.

Чәмнам тәккәмтәтә виңкли нәвмәл:

– Сүй ал вәра, сүй ал вәра! Тәм лүк ванхә әнтә йүл.

Йоққән нюлнам нәвмәм латнә, лүкнә пүкләң юх нәвты, лүк төвә рыхәмты. Оләннә сәйләй қанқан

нә йәмат әнәлхә арьяләхди. Тыт пырнә, сәйләй пәрәхләмәл латнә э-э-э тәқа мәх әй сәңнам мәрәхдәл, ваннә вәлтә юхәт-пөмәт әнтә пәкләт.

Нәмән ики, Кәсәң ики ылә выхәл. Әнтәднә нөмәксәхәл: «Ичәк мант қаньтәкәмтәхәл, әс телта тывтә нохәр пәкит, пев пәкит қәлнә пәкләт? Ти сәйләй пәрәхлөтә сүйнат тьык мәнлөт. Нәмән икинә сәйләй нәввил архә ти вәри, ти вәри, қачән йүтәл лүвнам вәри. Тю сәйләй тәл сохит айхә ти йәх.

Худмет места вуйм хорат

Дорвош районан «Рут музев мончат па йис потрат» нэмпи касасая китыдыйм рупатайт елды вантаты. Тата худмет места вуйм хорат понтсалдув.

Хор ханшам няврэмата ун пумаципа ясаң ясталдув. Щикем хорам хорат муң умащдыман вантсев. Тухалд ун хоятат тамиты хор ханшты холдна ант хошдат, хоты нын оляпан, ханшты юхатан хорамат верлаты.

Ядпа ёхатты талатан, касася верты айкелат худлаты ки, па пилтащияты. Хорам хорлан муң газетаева па китыдыяты.

Кашң няврэм молты верты ищи па хошад. Ал падаты па ал едэмтаты. Нын, ханты няврэмат ай пора элты Тураман мойлаптаман улдаты, хорам хорат ханшты, пормасат верты, эватты, нёхратты, сак каратты, сохам элты сэвты па холдна арсыр верат тусаңа верты.

Зоя Куртямова
ханшам потар



Литва Милена
3 место с.Горки



Сырыгин Игнат
3 место с.Горки



Ушакова Ирина
3 место с.Горки



Лаптандер Милана
3 место с.Горки



Контерова
Валентина
3 место
с.Лопхари

Газета

«ДУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 1962

Подписные индексы:
на год – ПА700, на полугодие – ПР561

№ 52 (1251)

Газета вышла в свет 28 декабря 2024г.
Подписано в печать 26 декабря 2024г.

по графику: 16.00
фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

Главный редактор

Яковлева
Алина
Кирилловна